



MARANATHA

For private Circulation Only

Takum - 47 | Pariak - 3

Ngienhiu - Chakehiu (Sept - Dec) 2020

*Agi
Manaibo*

To,

.....

If undelivered, please return it to LNBA (M) Head Office
Christian Centre | Chiang | P.O. Tamei - 795125 | Tamenglong Dist. | Manipur

Maranatha Magazine is edited by Rev. Alungbou Newmai, Owned by LNBA (M)

Editorial Board

Editor

Rev. Alungbou
Newmai

Asst. Editor

Kadalungbou
Newmai

Secretary

Kendibou
Newmai

Circulation Manager

Rev. Ch. Hujandi

Members

Heads of
Departments

For Subscription and Query
Contact at +91 8413015033 / +91 8837435633

Visit us on:



Liangmai Naga Baptist Association | <https://lnbam.org>



Former LNBA (M) Worker, Rev. ID Thuonbui tu LNBA (M) Worker dung wang adou khaijiu kakheng thi u ncham khaibo



LNBA (M) gu Driver, Mn. Stephen Niumai khatdi Ch. Alin tu Christian magiang thi u khaibo



LNBA (M) Executive Council makhiam tadkiu jiu bambo (Kasia maira makhiam bam ga wangtang lulak jiu Online ganiu jou mibo ye)

Palung ga bambo



02	Agi-manaibo [Editorial]
03	Christmas gu Tacham sum
05	Christmas Mission
08	Tingwang niu donsuh khai miboh pumtan se tam-tamjiu thinpiu ra
11	Christmas wangboh tuh machun tam- tamjiu ramgunboh
15	Departmental Reports
19	Tam-tambo tadkiu miboh
23	Pastor gu Salary Structure
26	Acknowledgement (Chunwicham)
27	Liangmai Christian Centenary Celebration Allotment Chart
28	Kakheng thiuh khaira

*Inside back Cover,
4&7*

Special Recipe

Editorial

Agi-Manaibo

Kadiriga lungjiu bambo aliu chamaina hina niu agi-manaijiu lung lura leng masen kam me. Zat khatniu zat khat khuga agi-manaijiu lungra kawi thiubo gu tienduan kam khai-e. Paphom khatniu paphom khat khuga kawi thiubam ra kam khai-e. Tanao-tana thiubo wan gadi khatniu khat khuga kawithiujiu lunglura ladrian thiue. Kykhun gadi agi-manaibo tu masen jiu tajan-thakga Manaiwangbou, Manailiu, Agi-manailiu, Chunchamlung, Kasutsiliu, kuakthuibou, Manonliu, Kuakkhaisiliu haichiujiu katam-tam ja mathak khaijiu bam me.

Agi-manaibo haisi paman kungthubo, withubo, kachia rangkang niu lungam lakbo ladkeng nge. Agi-manaibo ladkeng hang ga kuakhaibo, lungsabo, manonbo khatdi kasutsibo bam me. Haibo ladkeng si aliu chamaina khuga mawangjiu changam thiujjiu bamrabo leng Tingwang niu dam khai bo-e. Aliu khuga agi-manaibo habo jeng niu zat khat niu zat khat tu chari thiujjiu First World War, Second World War khatdi World War katam-tamjiu pad bambo aliu ngou bam me.

Agi-manaibo joumakbo ga aleng ronna phiu sune, Tingwang niu kadi-charam mathiu naleng pikhai bosu agu thiui ni sune, panao-pakina chuncham lulak rabo-e, Papui-papiu panah dung di arong ngamlakbo bam sune, khatniu khatri ga bam ni sune, khatniu khat tu kuak khaibo bam lak ge, athou-agibo bam sune, tathu-chara keng khang sune, lung kabuakbo pad sune, maiken tiakbo bam ra bo-e, wikhang ratu kam khin khai sune, khat thiubambo tu kampangbo mai khat thiui sune. Haikumbo thaksi bam midasai chamai thiujjiu lungbam tadi lungbambo gu pawat si bam lak ge. Haihina si Tingwang niu di luni makbo-e.

Agi-manaibo aliu lutou raleng kung gapbo di makge. Jesu Khrista si agi-manaibo wangpiu-e. (Is. 9:6). Tingwang gu ladkeng niu dinne, “Tuhoira malumbo gasu aliutu kam majikhai mibo duanniu, aliu Rapiu Jesu Khrista zan gasu aliu Tingwang khuga agi-manaibo bam me” (Rom. 5:1).

Jesu Khrista tu alung chun sing gasu lukhai gapbo mibo wan gasu agi-manaibo nangdi ehdi lutou mibo-e. Aliu khuga agi-manaibo bami saira Tingwang gu chunning ga aliu lungtang mibo-e. Haikumbo maira paringting ga kadih gadi khatdi Tinggen lamdi Tingwang gu thoidam lutoubo lungmi sune. Mathiuna tu agi-manaibo niu aliu ringting ga mawang jiu bambo thiumilo.

Christmas gu tacham sum (3 Messages)

2020 gu Christmas hai wang lan jiu bam me. Kadhipiri gu charariat kasabo niu karaiting kumjiu chunwi matha malajiu Cha'ngée lulak bamliu di, Jesu Khrista tu manah gapbo nai nchun aliu leng tacham sum thiujui pajai tam-tam jiu pikhai mibo se makum ncham khe. Haibo Kasanbo Chamriat khuang Luke 2:1-20 ganiu phui madai khe.

1. Tinggen Maza gu Tacham

a) Maichun piwi khaibo tacham:
2:10a - "Pingtulo" maksai "Pingmak ne" haibo ladjengse Tinggen maza niu Mily khuanmaidung khu ga din khai mibo-e. Aliu chamai thiujui saiping-e, Satan tu ping-e, chamikuang (hell) tadra tu maning khaijiu ping-e khatdi aringting dechiu lung ralo chiujui kapingbo niu aliu khu ga phui mibo-e. Haikumbo kapingbo hina se Jesu Khrista lungwangbo nai niu luthon khai mide chiujui Tinggen Maza gu kawibo tacham niu madu khai ye.

b) Tingtheng Karingbo/Juringbo tacham:
2:11-12 - Jesu Khrista lungwangbo nai chamainah hina leng tingtheng karingbo pikhai mide.

c) Agi-manaibo:
2:13-14 - Jesu Khrista lungwangbo hai chamainah leng agi-manaibo pikhaira leng nge.

2. Mily khuanmaidung gu tacham

a) Ladpiubo tacham:

2:15-16 - Tinggen maza niu din khai bose chiulujui Mily khuanmaidung niu kalangjiu Bethlehem lam tad mide. Haibo ladbam niu dinbora aliu Tingwang gu ladjeng chiukhailu, sikhailu khatdi ngou khailubo kumjiu palad piura bo-e chiujui aliu tu katikhai-e.

b) Pajat kawibo/pathou chabo lujiu Kawicham pouron khaibo:

2:17-18 - Mily khuanmaidung niu paliu Jesu Khrista tu phui raleng Bethlehem lam tadlujiu paliu mik niu ngou khai lujiu paliu tadkhaibo pabam hina ga Rankhaipiu Jesu Khrista lam pouron khai de. Sichiujui chiukhai lumai hina paliu suang hamide. Aliu di Christmas gu Kawicham se pajat kawibo phui lujiu pouron khai ra-e chiubo kati khai-e.

3. Kiriuki gu papao

a) Sansabo gu tacham:

2:7 - Kiriuky gu papao niu Kiriuky ga Jesu Khrista leng pabam paji pikhai makge. Haibo ladjeng niu dinbo ra Jesu Khrista tu lukhai makge chiubo lenkhai bo-e. Jesu Khrista tu lukhai mak maira pasansabo-e, palam ra sibo mai se tingtheng karingbo lutou mak mai-e.

b) *Npek mibo tacham:*

Mily khuanmaidung niu Jesu Khrista tu lukhaijiu akhat thiumibo-e. Chiudi Kiriuky gu papao sera Jesu Khrista tu lukhai makbo duan niu paleng ra tingtheng jeng Jesu Khrista nai npek mibo-e. Palengra kadih riga tadi Jesu Khrista nai npekbo ronna makjiu Tinggen gadi tingtheng jeng npek mibo-e.

Pariga tacham sum tam-tamjiu Jesu Khrista niu lungwangbo nai nchun pad mibo-e. Haibo tacham dung sikhai lubo kumjiu naringting ga, aringting ga degu tacham niu din, lung madujiu bamlo chiubo Christmas wan wangbo kum jiu aliu makum tou lukhe.

Christmas gu Kawicham kentou lumai mathiu riga Jesu Khrista gu pamalan thiumakbo tingtheng karingbo, agi-manai, chunwibo, diuwibo khatdi Jesu Khrista tu lutou lubo gu matha-malabo, ri'ngabo thoidam lutoubo thiumilo. Amen!

"Thainai David

Namdiga naliu leng

Rankhaipiu Khrista

tu mana khai hamme"

Luke 2:11

Recipes Prepared by Z. Witenthiliu Newmai

Eggless Omelette

Ingredients and Instructions

- * Besan (gram flour)-1/4cup
- * Maida(plain flour)-1tbsp
- * Water 1/3cup

Stir smoothly-5minutes then mix with the following ingredients

- * Baking soda and salt-pinch
- * Onion- 1 medium size
- * Green chilli/chilli powder

Mix well

Butter/oil-brush well in the frying pan-pour all the mix ingredients-tilt and spread-cook 2minute-flip over and simmer for 1 minute

Ready to serve!

Potato Pancake

Ingredients

- * 2 Potatoes (peeled and washed)
- * Onion (finely chopped)
- * Maida -3tbsp
- * Salt and sugar (as per taste)
- *Cooking oil and Butter

Instructions:

- Peel then sliced the potatoes.
- Boil potatoes until soft
- Add sugar-2tbsp
- Mix them together
- Add flour maida-3tbsp and mix them together
- Mash the potatoes until smooth
- Round it up then flatten it
- In a frying pan-heat butter or oil at a medium heat
- Fry the pancakes 3-4 minutes each side

Ready to serve!

Christmas Mission

Rev. M. Digombou, Mission Secretary

“Panainiu Antioch ga wangtang boga Phumling maidung tu pui aruang lujju Tingwang niu dechiujiu panaitu maluang tatién thiukhaibilo, khatdi Nkeng maidung leng dechiu malumbo npui lepat khaibilo chiubo paliu khuga din khaide”. (Tienkam, 14; 27.)

Aliu Christmas wangbo kum jiu thaikum Christmas gu mission debo ralo chiubo maning raleng pageng bamme. Jesu Khrista kadihga lung wang bose kadihmai niu patu siluraleng lungwang nge. Khatdi haibo kawibo champao haise aliu pamaidung khatdi pasai kasuimai dungtu Christian maidungtu dinron raleng khatdi pagu jengdin thiuraleng dindia ye. Tingwang gu kawicham hai kadhipiri pakhiang naga dinron raleng, tadui nphum khai raleng, pamai pithiu khai raleng khatdi Tingwang gu kawibo chengse katikhai lujju malum raleng ye (Matthew 28;19-20). Kadihri ga Tingwang cham chiumak jiu bammai wajiukha bambo wanga aliugu Christmas mission haise kali makjiu tiusakbo maksai chapon tania gu Christmas thiubam rama? Aliuniu Christmas thiuwang bo wan ga haikumbo maidung Tingwang gu karing bo cham simakjiu bammai dungtu maningtou khaimaksai Tingwang lad chiumak maidung degu thiuralo? “Dechiujiu malum matai makbo pakhuga nkha khaira khengralo?

Khatdi dechiujiu paliu niu chiukhai matai makbo champao situ malumralo? Khatdi kawicham se pouron khaimaksai dechiu paliu chiu ralo? Khatdi maidung niu paliu tu langkhai maksai dechiujiu paliuniu dinrontad ralo? Roukhai mibose kumbo-e. “Kawicham dinron maidung wangbose dejiukha maisuang habo gulo”. (Romemai,10;14-15.)Tingwang niu aliu leng Christmas pawan kawibo khatdi pajai kawibo pikhaibo wan ga maihina tu pagu kawicham dinron raleng pajai nia makum macham khe:

1. Nde gu Tingwang niu kamkhai milo?

a) Paniu aliu leng pawan kawibo pikhai-e. (Tienkam, 14; 27)

Aliu niu kadhipiriga Tingwang gu kawicham dinron raleng pawan kawibo doujiu bamme. Paul khatdi Barnabas niu Antioch ga hommai dungtu adou khailujiu Pamphylia lam sigasu Attalia lamtad-e. Panai niudinne Nkengmai (gentiles) leng kawicham dinraleng pawan kawibo doujiu bamme chiu dinne. Nkengmai dungleng malumbo nkham lepat khai bamme chiubo ladkeng paliu khuga dinne.

Tingwang niu tuhoi aliu mathiuleng pawan kawibopikhai jiu Tingwang lad dinron raleng npui maksai nkham dijiu lepat khaijiu bamme. John niu Khrista gu mission lamga haichiu jiu dinne.

“Sichiujiu nazai pen gasu chaphiu hina, chakhuan hina, jat hina, chakik hinatu Tingwang-mai pithiu khaibi-e”. (Madukhaibo, 5;9) Jathina Tingwang suang ga wang chapjiu ladjan thiu sune. (Madukhaibo,7;9) Tingwang jat hina tu lungsa-e. Maihina niu patu sibo khatdi pakhu wangbo tu luni-e. Sijeng gasu aliu pamai dungtu panu pacham pouron khaibo tu luni-e.

b) Aliu tu tadpat raleng panu kukhai-e. (Tienkam, 16;10).

Tingwang niu aliu tu kukhaibo chiu lugap bonai khatdi nangniu Tingwang tu adou gap chiubo nai Tingwang nang niu langkhai boga tadne chiujiu suikhai mibo-e. Abraham tu Tingwang niu dinne, “Nagu kadih nasingna khatdi napiuky phutuljiu Iniu natu lenkhai rabo lamse tadsulo.” (Chabangcham, 12;1) “Sichiujiu napen gasu I niu jat hina tu thoikhai bine”.

(Chabangcham, 12;3) Aliu tu Tingwang niu de pageng bamlo chiubo phuilujiu nang niu kangambo jai ga Tingwang tien thiuraleng kamkhe haise thaikum gu Christmas Mission thiukhe.

2. Tingwang leng aliu nde kam ralo?

a) Tingwang gu kawi champao se aliu lad kakingmai dung khuga dinmawi khairabo-e. (Tienkam, 18;6).

Tuhoi Liangmai Baptist Mission, LNBA (M) gu Mission Field; Laos, Myanmar, Nepal, Bhutan, Cambodia, Japan khatdi India chiujiu mission lang bamme. Parathiujiu India lung ga: Imphal

Valley Rongmei, Npuimai khatdi Meitei, Ahangruak Nepalis khuga, Imphal valley Liangnahdung khatdi Oklong area Nepalis khuga lang bamme. NC Hill Assam Zeme khuga, Tening, Nagaland Liangmai khuga, Darjeeling, West Bengal Nepalis khuga Siliguri, West Bengal Nepalis mai khuga Sikkim Sikkimes khuga khatdi Chhattisgarh Hindu maidung khuga Missionaries khatdi Evangelists lang jiu bamme. Haibo fields ga bammai dung Tingwang gu karingbo champao chiu khaini jiu lukhai nijiu bamme. Chiudi pabam diju mijiu mainiu tadpat khairaleng maihaju khatdi langkhai ramai papao hajiu bamme. Siniu thaikum Christmas gu Mission thiujiu souniu langkhai ralo, khatdi souniu tadpat ralo? Christmas wan wang boga aliu haikumbo ngam kamsan raleng kam lukhe khatdi Tingwang niu luni thubo kam raleng mission tu maningtou khaikhe.

b) Aliu mathiu haise Tingwang gu Missionaries thiurabo-e. (Tienkam, 22;21).

Maihina panu kabam bambo khaiga khatdi pabam bam ga Missionary gu bangrit aliu khuga bam kam rabo-e. Jesu niu dinne, “Tadlujiu haichiu dinron khailo, Tinggen gu chawangdih se nawang mide”. (Matt. 10;7) Sijengniu nangniu tienbo tadbo hina ga Tingwang ladniu naladnalui thiujiu dinra khatdi kamraleng Tingwang niu aliu tu kujiu dinbamme. Aliu Christian maidung tuhoi Tingwang gu jengdin thiu raleng Pastor khatdi Christian worker maidung tu

ronna malum khaimi makjiu Tingwang niu atu kupat lujiu juringbo pikhai bose parasi kengjiu masi raleng nge chiubo mangai mimakjiu parasi keng jiu masiraleng kamkhe. Tuhoi Christmas wan wang jiu aliu Christian thiubo gu parasy kengjiu masi san raleng kam lukhe.

Nriam khaibo:

John F.Kennedy, 35th. President of United State of America tu mainiu November 22nd 1963 bonai kamsat miboga wanchat khat lung gasu Radio, TV. gasu kadihipiri pakhiangna sichia kammibo-e. Chiudi Jesu Christa kadihmai nuan leng jeng niu lungwangbo champao khatdi nuan maileng saikhaibo champao ra tuhoi katang chamai sang sang chiu khai makjiu sikhai makjiu bamkha-e. Siniu sou niu tadpat jiu khatdi souniu langkhaijiu Christa gu kawibo champao haise dinkhairalo? Christmas hai dechiu jiu disanpat ralo? khatdi kadihipiri pakhiang na niu Christmas thiurabo chiubo hai aliu Tingwang khuga kakheng thiulu jiu tienbam sai wang tang sune. Siniu aliu maran jiu tatieu tien bamkhe. Christmas gu thoidam maihina riga Tingwang niu pikhaibo thiumilo.

**Recipe Prepared by Z.
Witenthiliu Newmai**

Pork Roll

Ingredients

- * Fried minee pork
- * 1 medium size onion (sliced)
- * 1 egg (slightly beaten)
- * 4 Cloves fresh garlic (diced)
- * Add ½ salt and 1/2tbsp chilli powder
- * 3 to 6 cup's cooking oil (for deep frying)
- * Sheets spring roll pastry 20cm

Instructions:

- In a mixing bowl, combine the pork and mix with salt and Chilli powder.
- Mix well and set aside. For best results, marinate it for half an hour before cooking.
- In a frying pan, heat 3tbsp of oil.
- Fry the garlic until lightly brown, add the onion and fry for 1 minute.
- Add the pork mixture and cook until meat is medium brown (roughly 5-6 minutes)
- Once the cooked mixture has done scoop a spoonful and lay down on a spring roll pastry.
- Then roll and dab a little bit of egg all over the roll.
- In a deep frying pan, heat the cooking oil at a medium heat. Then drop in the spring roll.
- Turn it over and fry until medium brown.

Ready to serve!

Tingwang niu donsusu khaimibo pumtan se tam-tam jiu thinpiura:

Anambou Newmai - Mission Coordinator

Tingwang niu somkhai mibo kikhun, dithinbo khatdi phumling donsusu khaimibo se pangam, khatdi machun tam-tam jiu donsusu khaimibo-e. Kikhun khatga maipiu niu kikhun gu papee thiujuu kikhun taluu ra pumtan pikhai-e. Dithinpao dungtu nchang-alingbo, majibo, siniu pumtan thinjiu param padih taliura Tingwang niu somkhai mibo-e, Chiubo kumjiu phumling tui Tingwang gu hiupuina siniu pumtan pikhaijiu hamirabo hiuna tu ranpad khaira pumtan pikhaibo-e.

Tingwang niu pikhaimibo ngam/pumtan dungse pangam-ngam ga thinpiu mawi khaibo se Tingwang chunning-e. Singku dungni dithinpao dung gu pumtan thinsu jiu phumling taluu ra Tingwang niu suikhai mak ge. Dithinpao dung Donald Trump or Modiji haidung niu phumling maidung tu nangra tadui nphumsui-e suimak ge chiujuu dinbamra suikhai mak ye. Karai dithinpao niu Council of Nicaea's ga Tingwang hai sumni khat thiubo (trinity) lamga tathuky ga phungwang jiu thu/tiamimak ge. Phumling khatgu malumbo ga kachukhaira kati khairabo hai phumling khatgu jupao dunggu ngiudon ne. Dinbo ga, John Calvin niu Michael Servtus niu majimakbo malum tachiang ga tadkhaibo ga kham mimak ge. Dithinpao Theodosius niu charipi khattu

kamsat mibo jengni Thessalonians mai 7000 tu kamsat mibo ye. Pagu lunlung hai nkiu juye chiudi dithinpao khatgu pumtan phungken mibo jeng niu kamsat mibo-e, Siga bishop Ambrose niu pagu phumling maikhat thiubo jengni paniu pagu phumling maidung rong gasu pajan kakra pumtan bamme chiudi kamsat suibo gu pumtan haye. Roman Catholic gu Bishops niu Edward Kennedy nai Joe Biden niu tanah khambo tu masenbo jengni Rapiu Tingwang gu malot pituu makra pumtan bamme. Dinramba jiuinbo tingga, Chawang Saul tu Tingwang niu Israel maiwang raithubo thiujuu Israel maidung tu atungmai, ngou khailakmai, paliudih paliuram tu ranpad khaira Tingwang niu pijuu chawang thiukhaibo-e. Chiudi Chawang Saul niu Tingwang niu patu pikhaibo ngam kammak jiu singku khatni tienrabo ngam rathak thiubo jeng niu pawang bangasu Tingwang niu luthon mibo-e (I Samuel 13:8-13). Daniel niudinne: "... Paniu chawangdung tu lupad khaiye khatdi paniu maidung tu chawang pithuu khaiye...." (Dan 2:20-21).

Sijeng niu Tingwang niu donsusu khaibo machunse tienmak jiu nkiu jiu tienmisai sise Tingwang niu suimakbo-e. Phumling maikhat thiujuu jupao maksai malummai thiubamdi kamaobo ngam kamsai dithinpao dungni nariga ladjan thiungambo pumtan se bamme. Haise

karai gasu Tingwang niu pikhaimibo ngamkam hai phumlingdi, dithinpao dungdi thinpiu siji thinra donsukhaimibo ye.

Tingwang niu donsukhaimibokikhun, dithinbo khatdi phumling hai khat-khattu majai jiu lungra.

Khrista hai kadih gadi Tinggen gadi pumtan bamme (Matt. 28:18), chiudi Tingwang niu aliu chamaina tu palam sum thiujju chakhuang thiujju khat khat tu majai jiu lungra khatdi nping siji lungra suikhaibo pahang ga lenkhai-e:

1. The Family

Nahmaidung niu puipiu kadin piujju lungra. (Eph. 6:10). Mainaodung niu paliu kinah tu chakhuang thiujju lungra ye palamra kikhun gu papee se papiu-e (Eph. 5:22-24, 1 Tim. 2:12), khatdi pakinah dung niudi Khrista tu chakhuang thiujju nanao, nanah dungtu lungsa jiu lunglulo (Eph. 5:23,25). Haise Tingwang niu donsukhaimibo machun se-e.

2. The State

Tingwang chamkeng niu dinne, “Rapiu zan gasu maihina gu pumtan hang ga bamlujuu, dithubo pumtan bambo wangdi hang ga bamlulo; sichiujju kawingam kammaitu thuanjuu, khatdi kasa kammai tu sajai pikhaira panii kadakhai bambo dihthinpao dung hang ga lunglulo”. (1 Pet. 2:13-14). Tingwang niu donsukhaimibo dithinbo maksai dithinpao dung tu chakhuang thiujju majaijiu lungra donsukhaimibo-e.

3. The Church

Khrista sai suimaidung niudi Khrista gu papee thiubo situ chakhuang thiusi ra-e. (Rom. 8:14), Palad kengtu (2 Tim. 3:16), khatdi phumling jupao tu (Matt. 18:17-20, Heb. 13:17). Chakhuang thiujju lunglura Tingwang niu donsukhaimibo-e.

Tingwang niu haibo sum setu khat-khat gu ngamkam tu chakhuang thiujju majai jiu lungra pikhai mibo-e. Haidung situ aliu niu lukkhai makge sai Tingwang tuidi lukhai makbo-e. Matt. 22:15-22 ga Pharisee maidung niu Jesu khuga ramkha (taxes) pibo lamga maniu ye. Siga Jesu niu rangkang gi se thinsu lujuu pakhu chap magui jiu bammai dung khuga maniu ye. Haise soumeng lo? Maidung niu kenkak ye, “Caesar meng-e”. Siga Jesu niu paliu khudinne chiuye sai, “Caesar dam karabo Caesar lengpilo, Tingwang dam karabo se Tingwang leng pilo” (Luke 20:2-26; Mark 12:13-17).

Haigasaliuniu silubo niu Tingwang niu Caesar tu kadih thinjiu majibo nchangbo ga ladjan thiujju lungra suikhaibo ye. Sijeng niu phumling nai dithinbo hai khat khattu alamjiu, atung mimak jiu lungra Tingwang niu donsukhaimibo-e. Karai ga America ga phumling nai dithinbo lamga kabuak jiu bambo wan ga John Calvin niu dinbo hai phumling niu dithinbo gu tacheng-tajai hai pijiu kamkali khairabo-e. Sijeng niu John Calvin niu Geneva naamdih gu tacheng-tajai raopad jiu khaibo-e. Paniumalumbo hai pijiu state tu kamkali

khairabo hai phumling ga pumtan bamme chiujiu lukhai-e. Martin Luther, niu dinbo hai phumling nai dithinbo (state) haira patanpui maksai pasingna karai kum jiu lungra donsuhaimibo ye. Tingwang niu khangnia tuse suikhaijiu pangam tam-tam jiu khat khat tu alamjiu lungra donsuhaimibo-e. Chiujiu bambo ga Thomas Jefferson gu “Bill for Establishing Religious Freedom” haise Assembly of Virginia ga 1786 gasu roubo se phumling nai dithinbo hai npengbo lamga roukiu khai-e. Paniu phumling gu khenrang thiubo nai dithinbo gu katambo se dinlin kaimibo-e. Dunjiu dinbo ga governments/dithinpao dungniu Tingwang niu damkhaibo gandam hinatu macha mawajiung lungra, phumling siniu pagu kawicham se dinjiu pijiu maihina niu juringbo dou jiu lunglura leng-e. Chiujiu Tingwang wangkiu lan makthen paniu donsuhaimibo hina seniugimananai jiu lungbo situ Tingwang gu chunning si-e.

Munkomkhaibo:

Tingwang niu wahina se wijiu, agimananai jiu lungbo lunibojengniu kikhun, dithinbo khatdi phumling haidung sumse paniu donsuhaimibo-e. Sijeng niu tuhoi kadihram ga lungjiu bammai tu Tingwang niu pangam kam tam-tamjiu kasiamai tu dithinbo hang gasu cha-ngam (government job) kamjiu padi-param, pakilong, pakikhun taliu jiu lungra, kasia maitu phumling hanggasu shingku tien, wichamdinbo (missionary/evangelist) ngam kamjiu pakikhun, pagu phumling maitu taliura, khatdi Tingwang gu kawicham se lutou lumakmai khuga

poukhaira pikhaibo-e.

Tuhoi aliudih, aliuram, aliunaam hina phuibo tingga kikhun, naopui naopiu, khatdi panah-patahmaidung, naam khatga naam gu chairman, village authority council maksai apai khatdi phumling ga phumling gu pastor, deacon khatdi malummaidung haichiujiu maihina aronglu naam thiujiu lung bamme. Haidung hinase Tingwang niu donsuhaijiu bammibo-e. Sijeng niu aliu maihina Tingwang niu natu atu pikhaibo ngam haitu maning makungjiu siga nchangbo, alingbo, maranbo hai bamjiu changan kamra pageng bamme. Pangam ngamga tachun khaijiu, khatniu khatu khan mimak, tia mimak jiu khatkhat ngam tu chakhuang thiujiu, khatniu khat tu kawibo npui ga kachu khaijiu majang ncham jiu lungra pageng bamme. Tingwang suang gara nang niu dithinbo ngam kamlubo siniu di-nkiu mimak ge, nangniu kikhun ga papee thiulubo niu dih nkiu mimak ge chiudi Tingwang niu donsuhaiibo hai maihina tu pagu gandam hanggasu nchamjiu, agimananai jiu khatkhat tu chakhuang thiujiu lunglu raleng jengniu pikhaijiu bambo-e. Martin Luther niu dinne, “Christian mai khatniu chari ga tad bamdi, ladjan bam ga wang bamdi, paniu kambo ngamkam hina se Christian mai lungchun bamkam raye”. Sijeng niu maihinase nchangbo-alingbo majibo, agimanaibo leng maran jiu aliu kadihtu pijiu lung agimananai jiu lunglu nibojengniu haibo ariak peahai tamtambo ariak gasu kada-kaduilu jiu rao khaibo-e.

Christmas wangbotu machun tamtam jiu ramgunbo

Ch. Mercy - Women Secretary

Khristen mainiu chunwiji manidbo khatdi cha'ngeebo hai tamtam jiu bamme. Chiudi, aliuleng withubo khatdi dithubo cha'ngee haisi Christmas si-e. Aliuniu takum machang Christmas wangra tu huijiu ramgun bamme. Chaky chalu tien thiumai atiet loilu jiu mathak bamme, ariak-nahmai pabam katam-tam lamsu chunwiji palu ky juan wang jiu bamme, chali-alimai niu chaphai-tani pajat-jat phungwang jiu jon bamme, maipui niu panahmai ben julujui chapon tania liusu mide, khangsia mainiu Christmas leng chakha-chami kaden jiu bamme, chunwiji chaky puan thiujui khatdi Jesu manabo lui thiujui bamme.

Ndekam jiu mai mathiuniu Christmas wangratu nkhuon lulak jiu bamlo? Aliuniu Christmas leng wajiu ga ramgunjiu khatdi kaden jiu bambo hai machun tamtam jiu bamme. Khangsia mainiu chaphai tani kasan piura, khangsia mainiu palu kykhunmai tu adou raleng, khangsia mainiu chakha-chami tiuraleng, khangsia mainiu tiumaniu-sakmaniu lujiu charong-chapa thiura, khangsia niu matha aruangjiu chamlem lem macham raleng, chiudi khangsiamai ra palu chun wiji Tingwang tu thuoinkui khai kanibo lungchun phungjiu agun bamme. Takum-takum wang jiu Christmas thiubam tadi Khrista joumakbo Christmas thiubambo maikeng jiu

bamme. Aliuniu Kasanbo Chamriat ga kenkiu sai khangsiamai ra Jesu Khrista lungwang bogu chunwat nai agi manaibo paling jiu dou kamimai tu ngou-e, chiudi khangsiamai ra Jesu Khrista lungwangbo gu paramba sitang lumak mai keng jiu ngou-e.

Paling makbo Christmas

Aliuniu Matt.2:3-4 phuisai chawang Herod, Jerusalem ga bammai khatdi tacheng-tajaigu katipaodung niu Jesu Khrista lungwang mibo tu silu makge. Naimik pat lamsu ningtingmai niu maniu-e “Jehudimai Wangleng mana khai bambo ngehnahsi delam bamlo”? Haibo lad chiu khaiibo ga paliusuang hamide khatdi palu lung manang mine. Palu tu Rankhaipiu mana wangbo tu sikhai lumakge. Tingwang tu simakbo Nkengmai (Gentiles) niu palu tu Rankhaipiu manawang bamde chiujiu poukhai bi-e. Chawang Herod niu ningtingmai khuga hai chiujiu din-e, “Tadsulo, ngehnah situ phiumawi jiu phiulo, sichiujiu nangliuniu Patu doudasai atu pisikhailo. Sichiusai Idi Patu kahumra tadne.” Chawang Herod niu pachang jiu Jesu tu kahum khainibo makge chiudi Jesu tu ndetiu sai kamsat luralo chiujiu patu kahum rabo sou thiujui maniu bo-e. Pawangbam si mainiu malin miratu manang jiu khatdi manma jiu panou-panahmai tudi kamsat mibopiu-e. Jesu lungwang bandi paku

ga agimanai bo khatdi juringbo doumakge.

Tingwang tu simakjiu chali-ali jiu bambo maki-charamai Chakehiu (December) pat susai aliu Christian maisuang rajiu paliu gu dukan (shop) ga chagan (star) khaijiu Christmas lui thaking-king jiu kam malum rai mimi-e. Paliu hai pachangjiu Christmas wangbo tu ramgun boma? Chiumakge, rangkang dou makeng raleng paliu gu chapot tu advertise kamjiu bambo-e.

Aliu chamai kakeng Christmas wang bamdi chamipum ronna leng Christmas thiukhai mi-e. Christmas zan gasu tiuwi sakwibo, chaphai tani kawiwibo khaijiu bamme. Chabuanmai kakeng charaky ga tadjiu Tingwang ladlui nkingbo suang, charuang-chapa maksai mathajiu chalemlem boga ronna wangkhai maikeng mine, Christmas hall ga bitadi katiu-kasak rim niu manam-piu jiu bam mine.

Christmas wan ga akykhun khatdi aka-aphenmai tu majang jiu chunwi rabo sung tiusak lujiu agi-athoubo hai keng bibi mine. Christmas wanga khangsia kikhun ra chamikdui kiujiu bamme. Chamai kakeng niu charaky tadjiu mathabo sung pabau-bau thiujui chakeh tatam, taruak thatiubo tu masen diang mine. Pachang paling bo Christmas gu pawat hai lutou makjiu chamipum masen botu aliu lungchun khaijiu bamme. Haikumbo maira Chawang Herod khatdi Tingwang tu simakbo

maki-charamai suang wi-nkiu suan makge. Tingkum waji Christmas cha'ngge wang bamdi, chamipum gu luni ga cha'ngge khaimibo jengniu tuhoi di Jesu tu lutou makmai waji bam phui-e.

Palingbo Christmas

Kadihipiri ga chunwi mathara khatdi agimanaibo दौरा chamai kakeng niu majibo tun ga phiu khai makjiu kadihipiri gu mania ga mangiu khaijiu lungbo mai kengjiu bamme. Palamra paliu hai Jesu Khrista gu kawicham nchiu matai makbo khatdi lukhai makbo duan niu-e. Chiudi, majibo npui khatdi tingtheng karingbo doubu gu chunwat sera Jesu Khrista ga ronna ye (John 14:6). Jesu Khrista tu pachang paling jiu aliu lungchun niu lutou lubo jeng niu aliu khuga chunwibo khatdi agimanibo dou rabo-e.

Mily khonmai:

Karaibo chaken (1st Century) ga Palestine-mai gu chakhuan-charuang (social status) ga hai mily khonmai dungtu mai khat niudi waleng lukhai mak bam niu-e. Paliu tu hai charatu simakmai, tacheng tajai simakmai, tasii simakmai khatdi lungchang phung makbomai chiujiu lukhai-e. Paliu hai pabam khat gasu pabam khatlam paliu gu milydung tu maluung lujiu tad-e. Mily khonmai dung leng maikhat niudi chunwicham poukhai bibo ha ye, sibo sung paliu niu nam khat ga wangbo ting ga sibo nam se kam tania khai mibo leng lukhaijiu paliu tu hai wa kasabo gu madan thiujui lungbam niu-e. Chiudi Tingwang niu

paliutu mangai mimakge. Rankhai piu Jesu tu Bethlehem ga mana khaibo kawicham si paliu khu ga rajiu din khai bi-e. Agibo chunding ga Mily khonmai dung niu paliu gu mily khonbam boga, Maza siniu paliu khuga din-e, “Pingtulo! I niu naliuleng kawibo champao phungjiu wang-e, haisi maihinaleng chunwi mathabo gu-e. Thainai David namdih ga naliuleng Rankhai piu Khrista tu mana khai bamme”! (Luke 2:10-11). Mazadung niu din khaibo tu paliuniu wadi malum masabo thiumakjiu paliu chunwiji Bethlehem lam Jesu tu phuira tad sude. Paliu niu tadmeng boga Mary nai Joseph tu khatdi ngenah siniu Khouring kuang ga jibam niubo ngoude. Mily khonmai dung ga Tinggen Maza niu dinkhaibo kumjiu paliu niu meng tang jiu ngoulubose maidung khuga dinkhai ye. Paliu gu champao khatdi paliu niu dinbo chiu kalumai hina niu paliu suang ha mine. Paliuniu Jesu tu ngoulubo duanniu Tingwang tu thuanjiu chalui thiujjiu malan wang mide (Luke 2:20).

Mily khonmai thiubo jengniu chamai kakengniu waleng lukhaimak bam tadi paliu hai pachang jiu Jesu Khrista lungwangbo gu chunwat nai agimanaibo doulu-e. Paliu niu Khrista lungwang bogu gu kawicham se paliu leng ronna lukhai mimak jiu maidung ga pouruan khai mibo ye. Sikumjiu Christmas wangbo ga Rapiu Jesu tu pachangjiu lutou lumai ra Tinggen gu agimanaibo nai chunwibo si dou rabo-e khatdi Jesu Khrista gu kawicham se maidung ga lung madukhai rabo-e.

Tingbang lamsu ningtingmai:

Paliuhai nkengmai (Gentiles)-e khatdi Jesu Khrista kadihri ga nuanmai tu rankhaira lungwang rabo lam wadi simakbo mai-e. Chiudi Jesu tu mana wangbo ga paliu gu paman kakungbo kalen phunglujiu paliu chunwiji Patu lungwangbo bam lam juantad lujiu kahumme (Matt. 2:11). Kaguangbo Chamriat ga phaimiu kakung dung niu masuang jiu Jesu Khrista tu manawang rabo lam ga din khaimibo-e. Chiudi Jehudimai makjiu nkengmai niu Jesu Khrista Kadihri ga lungwang bosu rajiu silujiu Pahtu kahumra tad-e.

Thainai aliu Jehudimai kumjiu Jesu lamga wajiu siji bamme. Kristen kykhun ga nang-I lungwang lubojeng niu maksai Jesu lamga simakengbo jengniu aliutu ranlulak ge. Matt. 7:21 “Rapiu, Rapiu, chiujiu atu kumai hina tinggen kadihga ngutlakge. Chiudi Tinggen lam bambo Apiu maning tenmai dung ronna ngut ra bo-e.” Tingbang lamsu wangbo ningtingmai kumjiu aliudi Jesu Khrista tu aliuchun pakhiangna joujiu phiulukhe khatdi aliupum hai Jesu leng kalen thiujjiu pikhai lukhe.

Thainai aliu Kristenmai kakeng niu Christmas wangsai aliuniu pipatbo sung maikhuga matha khengbo (donation) keng khang mine. 2017 kum Christmas leng I chaky wangne jiu Dimapur Bus Stop ga ntou bambo lon aliu Nagamai akhang-aliu mai cartoon box pon lujiu Christmas leng tiujiu Tingwang tu simakbo maki-charamai

khuga rangkang kheng bambo ngou khai lujiu alungmak khai mi-e. Aliu Khristenmai Christmas jan gasu maikhu ga rangkang takheng jiu bamme. Christmas gu kawibo ramba si aliuniu nkengmai tu pijiu lumou khai jiu bamme. Sibosung aliu niu Khrista gu lungsabo nai agimanai bosu mariu charimai, papum ruangjiu bammai, lungchun chariu jiu chunsajiu bammaitu lunglen khaira-e. Parathiujiu Christmas gu kawicham hai nangnahmai khatdi Tingwang tu simakmai khuga dinkhaira aliu gu ngiudon-e. Romans 10: 14 “Dechiujiu paliuniu chiukhai matai makbo champao situ malum ralo? Khatdi dinronpao joumakjiu dechiu paliu chiuralo?” Aliugu Christmas hai Christmas hall ga kawicham nkingbo, chalui thiubo niu kaloibo thiumak jiu Jesu Khrista gu kawicham hai maikhu ga poukhai jiu kawibo lunlung lunglen khe.

Aliu 2020 gu Christmas cha' ngee leng wajiuga kaden jiu khatdi agun jiu bamme. Chiudi Rapiu Jesu Khrista leng pabam pikhai maksai aliu gu Christmas hai charuang-chapa (enjoyment) thiukhai tamira bo-e. Aliu Khristenmai kakeng niu tingkum wajiug Christmas manid wangjiu bam di Jesu Khrista tu lukhai makmai keng jiu bam kha ye. Rev.3:20 “I hai kamun ga chaplujiu akham magan jiu bamme, soukum mainiu akhuan hai chiulujiu akham lekhaisai I niu kalung ga ngut jiu patu malong tiu nchamne.” Jesu tu lungwang boga Bethlehem ga bammai paliuky lekhai makge chiudi Mary niu papum

pahiuna pikhaijiu Rapiu Jesu tu lukhai-e. Sikum jiu aliu niudi aliupum aliuhiuna Rapiu Jesu leng pikhaisai paling bo Christmas thiulu bo-e. Nang I ndechiu bojaiga Christmas thiubamjiulo? Rapiu Jesu tu palingjiu adou lubo Christmas ma maksai tiuwi-sakwibo, chapon kasan khaibo, tiusak mangiujiu agi athoubo maksai nang kykhun wang aruang lubo jeng niu Christmas thiubamma? Thaikum gu Christmas hai Jesu Khrista tu paling jiu adou lubo jengniu chamipum nai hiuna ga chunwi agimanai bo thiulo!

*” Aliu leng ngena khat lung
khai bammre!*

*Sichiujiu Panu aliugu Mawa
ngpae thiune.*

*Patu se, Maisuanghabo Lad
pikhaipiu, Ngaukambe
Tingwang, Tingtheng Ringbo
piu, Agi wanaibo Wangnapiu
chiujiu kune”.*

Isaiah 9:6

Departmental Reports

Education Department LNBA (M) gu Chuwi Cham

Education Dept. LNBA-M niu phuijiu bambo **Hamai English High School**, Namraining Tamei Hq. niu thaikum 2020 gu Academic Session ga Tasiinah pakhiangna 668 admission thiukhai luhwe. Khatdi, School staff (*teaching & non-teaching*) 27 chiwjiu wang changam kam aruong khaiye. Chiwdi, Chakemra (Coronavirus-Covid19) niu Kadiri pakhiangna tu kam kabuak mibo gasu kanahiu jt.18:2020 naih suh pawan katheng class lumatun lumak mide. Nahmai dung tu maidih mairam lamkum Online class luhra lengdi puipiu mai kalek shajiu Computer/Mobile phone lura rangkang hahbo riga aliu dih ga sikumbo Internet facilities dou maklan chiwmibo gasu maiphen-mairen lulakjiu tingkum loikhai mide.

Chiwdi, Hamai Tasiiky ga palu nah tu langwang khaibo puipiu dungra Manipur ga lung bamdi, Puipiu nai Katipao gu Madui (*Staff & Parents' Meeting*) naih Meghalaya, Kerala lam lungbambo ningtingbo puipiu dungkum wah maning npih-npanghlu palu nahmai tu nkhi bambo katipao dung gu chariu di sikhaijiu palu nahmai gu Tuition Fees (*KG II-Class IX*) lam ga chunwiji chahiu 11 gu pinejiu chamchang luweh. Puipiu kasiara chahiu 12 gu Tuition fees palu ra pikhaine chiwjiu ladriat thiukhai maidi jouweh. Manipur pabam katam

ga bambo puipiu dung kakengra “*No Work, No Pay*” chiwbo ladbam hang ga Tasiiky dung tu Tajonky (*Shop*) nai din kadalu chakhuon-charah kengjiu padkhaiye. Chiwdi, Hamai Tasiiky ga palu nah tu khaibambo puipiu dungra palu nah tu Christian Ministry hang ga Tingwang zan gasu tasi pikhai bambo katipao dunghai palu niu makeh bijiu tasiiky ga wang makbo gu makge, kadi wan kasha jeng niu weh chiwbo si masanneh. Siniu, palu leng chafih pimaksai palu nao nahmai tiuhra kaki lamsu luhra hahye chiwbo silu palu niu *School Authority* dung suongdi manangh diangkhai biye. Education Board, LNBA-M niu di puipiu dung lungchariu bamdi palu gu lungchun masambo jeng niu Tasiiky lam suh ngamlak juumai leng chiwjiu chamsui katinlu 2020 gu Tuition fees hai KG.II niu chahiu 6, Class I-IV katang niu chahiu 8, Class V-VII niu chahiu 10 chiwjiu ‘Tuition fees’ nkhin khailan miye. Nkiujiu, katipao gu pawat silujiu katipao niu mariu-charijiu pachun shamisai palu nahmai ringting ga Thoidam daolu lakge chiwbo masanjiu silubo jeng niu paliuchun dijiu palu niu pikhai kajibo hina chunwiji pikhai biye. Hamai tasiiky ga bambo puipiu dung gu kawi jeng niu Tingwang nai puipiumai tu dijiu thuongneh. Palu riga Tingwang gu malih-malanhbo Thoidam pikhai sanbo thiumilo.

Hamai Tasiiky gu Academic Session 2021 leng pisikhaibo:

1. Admission hai Chabamhiu Jt. 6 Machanaih gasu lehmi suhne.
2. Tingkum chang tadkiu bambokum 2021 kum gadi Nursery nai KGI tura Admission thiukhai misai Tuition Fees lulakge.
3. Nursery gasu KG.II Bus service mathah(free) pineh. Class I tu ra paphan (half) luhneh.
4. Chabamhiu Jt.7 naih gasu class X kiura mainai HSLC Examination khairamai class tadsuh mineh.
5. Kadiwan niu wah kabuakbo padsan maksai Nursery gasu class IX ga katiramai hina Chabamhiu Jt. 18 naih gasu class tadsuh mineh.
6. 2021 gu Academic session ga promotion daolubo Hamai Tasiinah dungra masuongkum Admission thiumakdi class joukaam raye.
7. Katipao leng luhsanra:
 - i). B.Sc. Maths kati ngammai khang khat,
 - ii).Nursery & Lower class tu katibo ga experience bammai/Nursery tu katira Specialise thiulubo gu Certificate bammai maipui(female) khat chiwjiu luhra bamme. Wangrai raibo ruong ga kamsi lubuimai tu kadaa suhne.

Chunwibo Christmas nai Tingkum kasan (2021) gu duan wibo maihina lutaujiu mipum nai hiuna leng lungsa sibo Rapiw Tingwang gu thoidam kengjiu daosanlu Chakhuong Chan'gee chunwiji chan'gee luhra khatdi lungmasangkmanangkbo gu Tingkum Kasan thiuluhra Rapiw ga kheng bamkhe. Rapiw Khrista gu kuok khaibo lungsiet niu maihina tu soumakjiu maluang khaibo thiumilo. Amen.

*Dr. Hunibou Newmai,
Education Director,
Liangmai Naga Baptist Assn.
Manipur.*

Men Department

Men Department Annual Meeting 2020 kum gu thiujju Dikiuram Nhang Baptist Phumling ga Jengtung 20 Matuingeehiu 2020 ga tadkiu khai mide, siga chamai 30 wang khaijuu Agenda hina wijuu makhiam thiukhai lude.

Kadihiri gu chararet niu kakungbo wajiuga bam liudi Chara jan gasu Papiumai gu chaphuam (men society) tu kakungbo bamjiu paliu pum pipat jiu wangboga Phumling mainiu chunwijuu lukhaijuu taliu mawi khaibide. Wangjiu makhiam aruang boga, 2021 kum gara Papiumai dung gu chakha se chamai pum ga Rk. 150 (Rs. 150/- per member) lumikhe chiujuu ADA ga approval leng phung khang ra suikhaide. Maipiu mai hai chaphuam sum (3 societies: Women, Youth & Men) bambo rongga chamai riak tam kachang, siriga sanjiu member kasia mai chabon mai phuam ga jouni khatdi kasiamai paliugu chakha di pimakbo jeng niu changam ga wangtang lulakbo kengjiu bam mibo ye.

3rd Men Conference ga taliupat khaijuu bambo chapot:

1. Sakak (*Waistcoat*) 100 pasan bamme, paman niusai Rk. 1500/. Men Society hina nia jam lukhai khelo.
2. Gasiuriang (*Necktie*) 100 pasan bamme, Paman niu (*Zipper*) Rk. 550/ (*Plain*) Rk. 500/.
3. Bible top (*Bible Cover*) 20 bamme, paman niu 250/.

Rev. Ch. Ngouroubui
Men Secretary

Women Department

Tingwang niu chalungsa khaijuu kadihipiri pawan wajiuga sabam tadi aliu LNBA-M Women Department gu Annual Meeting hai jengtung 2nd December, 2020 bonai ICLD Christian Centre, Chiang ga wijuu tadkiu khai lu-e. Haibo meeting ga Society samriu khat (31) lam su chamai 68 wang jou khai jiu makhiam wijuu tadkiu khai lude. Makhiam thiura wang khai mai mathiuna tu thuonkiubo madu khai ye, tiujuu wang lan bo ga di naliu mathiu gu support khatdi cooperation tu agunjiu bamme.

Ch. Mercy
Women Secy. LNBA-M

Youth Department

Aliutu pawan machang ga gukhai bibo aliupiu Tingwang niu lungsa khaijiu LNBA-M Youth Department gu ministry N-gienhiu-Chakeahiu (September-December) lung ga wiji tadkiu khai lubo hai mathiu khuga chunwiji dinkhai-e.

Thaikum 2020 Youth Day of Prayer hai jengtung 10th Chagaahiu (October) ga society kakeng niu manid mawiji manid khailubo jengni society ga parid lujiu bambo Youth deacon/deaconess khatdi paliugu executives maitu Youth Department lamsu thuankiubo madu khai-e. Wang lanbo takum 2021 gasu sujiu Youth Day of Prayer hai Chakeahiu (December) 2nd Saturday machang naga manid miraleng LNBA-M Annual Delegate Assembly Meeting 2019 gasu chapkhai mide chiubo haidi mathiu khuga din katin khailan-e.

Youth Winter Camp cum Annual Meeting 2020 hai Ariang Baptist Church, LNBA-M ga jengtung 4-6 Chakeahiu (December), 2020 ga tadkiu raleng marang khaiubo hai COVID-19 duan jengni aliu leng aruang kakungbo nai tad mariu kungbo bam mibo jengni LNBA-M Centre Church, Tamei ga Winter Camp jaomak jiu Annual Meeting ronna tadkiu khailu-e. Haibo meeting leng jengni chamai riak tachat-chat (88) khatdi society makai chinnia (27) wang khailujiu Meeting wiji tadkiu khailu-e.

Youth Annual Meeting 2019 ga kari (vehicle) luralreng chapkhai lubo kumjiu Tingwang niu lungsa khaijiu Kari (Gypsy) hai LNBA-M Youth Department leng lukhai lude. Haibo Kari haisedi Jengtung 4th Chakeahiu (December) Youth Annual Meeting bonai Rev. Alungbou Newmai, Executive Secretary LNBA-M niu Rapiu khuga dedication ngam hai wiji tien khaide. Vehicle Project Committee leng kada khai maidung niu paliu niu kangambo ga nkha khaijiu Fund Raise hai thi nkha khaibi-e; paliu tudi thuankiubo madu khai-e. Nkiujiu nkha khaibibo Youth Societies, Churches khatdi malimai (individual) mathiu tu thuankiubo nai chunwibo madu khai-e. Nkha khaibibo Societies, Churches khatdi Malimai (individual) paliu jan nai pariak (amount) details haira Maranatha March 2021 issue gasu mathiu khuga lien khailan sune.

Rapiu gu saomakbo lungsiat nai agimanaibo seniu mathiu tu pawan machang majang khaijiu CHRISTMAS khatdi TAKUM KASAN NGEE wiji cha'ngee lubo thiulo!

*Kadalungbou Newmai
Youth Secreatry, LNBA-M*

Tam-tambo tadkiu mibo

September 3, 2020

Rev. MP. Namthiurei Emeritus Pastor gu funeral service ga Tamenglong lam Rev. Alungbou Newmai, Executive Secretary niu majang lujiu Cabinet khangsum; Rev. Ch. Ngouroubui, Men Secretary, Dr. Hunibou Newmai, Education Director, Rev. Ch. Hujandibou, Finance Secretary khatdi aliugu Driver Ch. Stephen kumlujii LNBA-M malin thiujii chalad din khai de. LNBA (M) lungpad bonai panu ZBA gu field Secretary thiujii Tingwang khuga kakheng thiu khai de.

Sironna makjiu aliu gu Association ga karaiting Youth Director khatdi Field Evangelist thiukhaiibo Rev. ID. Thuonbui, Pastor, Namtiram B/Ch tudi paleng wimakjiu bambo jeng niu panahpiu kiga wangtang khai lujiu kakheng thiu ncham khai de.

September 20, 2020

Workers khang kariusum (13) Cabinets, Office staffs, Coordinator, Chawkidar khatdi Driver aliu mathiu Liangchi Baptist Church ga tad lujiu Sunday Morning service lu khai de. LNBA-M workers khatdi Liangchi B/Ch gu workers mathiuna Association wiraleng khadi Liangchi Phumling wisan khangra makhiam thiu khaijiu Tingwang tu thun kiu khai de.

September 27, 2020

ES niu malong lujiu Finance Secy, Office Assist, Children Coordinator, Chowkidar khatdi Driver Gaililong Baptist Church ga Sunday Morning service lukhai de. Nsuan siu loi lujiu Gaililong Church workers and LNBA-M workers emergency meeting Pastor lam ga makhiam thiu cham lujiu Nomination Committee 18 October nai form thiura chamsui lukhai de.

September 30, 2020

Chawangkinging gu New Church Building ga dedication gu Rev. Alungbou Newmai, Executive Secretary niu speaker kam khai de. Rev. Z. Mairilungbou Niumai niu Minister thiu khai de.



October 1-5, 2020

Executive Secretary khatdi Cabinets khangmadai niu raikachang bogu touring thiujii Taningjam, Niamning, Upper Phelong, Phelong, Namtiram khatdi Ramgem Fellowship (NBC) ga tad khai de. Haibo touring lung ga Ramgem Fellowship, ga chabuanmai khangkariu-magniu tu Exe. Secy. niu *Trinity* zan gasu Baptised thiu khai de.

October 12, 2020

Office gu devotion wan ga chalui thiubo ting Guitar pageng bamjiu maikhuga chunwiji pikhaira kasuimai tu phiuboting ga Majikambou Newmai, Town Baptist Church, Tamei niu pagu Theological Training tad kiubambo tienduan ga tathui jiu tadkiu lura Tingwang niu thoi khaira chunwiji Guitar Rk. 15,000/- gu pikhai de. Pariga Tingwang niu thoi khaibo thiumilo.



October 20, 2020

Pating-pawan sai suiuiu wahina adjust thiura pageng bam mijiui thainai mien gu Executive Council makhiam hai LNBA (M) gu racham ga rai kachangbo thiuiuu Online ganiu Rev. Ch. Lubui, Vice-President niu bampi lukhaijiu chamsui 1-11 katang lukhai de. Members dung papum thiuiuu wangtang lulak maidung niudi online ga makhiam thiubo padam sedi lu ncham khai ye.

October 25, 2020

Rev. Alungbou Newmai, Exe. Secretary niu administrator kamjiu Z. Kacham, Pastor, Nkhomlong B/Ch tu Licensure pikhai de.



November 6, 2020

Atongiuning Baptist Church, Luangdi tu LNBA (M) ga lukhaibo (Affiliate) ngam hai Rev. Alungbou Newmai, Executive Secretary, LNBA (M) niu tien khai de. Sanjiu, Pastor thiuiuu bambo Chariwangbou Rd. Pamai tu di Rev. Ch. Widabou, Pastor, United Baptist Church (Liangmai), Tamenglong niu ordained thiukhaibo ngam haidi kam khai de.



November 6, 2020

Tingwang lungsiet pen niu Children Ministry gu rai kachangbo thiuiuu Online Bible Recitation Competition tienrang macha pat khaibo ga phumling 17 ganiu nahmai 30 aliet khai ye. Paliu niu Kadincham 20:1-22 gu ladriang se masan-manuan jiu ken mui ken khai ye. Phumlingmai khatdi pui-piu thiumai dung niu nahmai tu kachu mawi khai bijiu haibo competition se ka tanuakbo thiumakjiu wijiui tadkiu lu ye. Tingwang tu thuongkiu bam khe.



November 29, 2020

Makuilongdi Baptist Church gu Pastor thiujii bambo Dr. Absalom Pamai, tu Rev. Alungbou Newmai, Executive Secretary, LNBA (M) niu Administrator thiujii ordained pikhaibo tien thiukhai de..



December 1, 2020

LNBA (M) Centre Church, Tamei (Namraining) gu kahumboky kysan ngutbo ga Rev. Z. Mairilungbou Niumai (Retd. E/S, LNBA-M) niu N-nui tuh lepat khaijiu khatdi Hujubou Niumai (First Pastor of LNBA-M CCT) niu kahumbo ky nkham le ngut jiu Kysan ngutbo tienran se wijiui tien thiukhaide.

Haibo Tienrang nai npanjiu LNBA(M) gu Executive Secretary tingkum makai mangiu (25 yrs) thiukhaibo Rev. Z. Mairilungbou Niumai tуди Office lam niu khatdi LNBA(M) Phumling dung niu kanui khaibo tienduan di wijiui thiukhai lude.



December 3, 2020

Piulong Baptist Phumling gu Office ky chami niu ruthon mijiu Phumling gu chariubo wan ga LNBA(M) workers maidung wangtang khai jiu Phumling kating dung nai kakheng thiukhai ye. Phumling gu Office mania (*Documents & Materials*) macha sulan rabo ga thinpiu khaira keng mak taliudi rangkang thiujii kasia nkha khai bi ye.



December 8, 2020

Children Ministry ga changam thiusan jiu bam lura leng khatdi nahmai dung gu ministry ga mobile thiujii changam kam lura leng jeng niu aliu gu Local Minister, Mn. Awangbow Newmai Kykhun niu Diphubou Machungambou Newmai, zan ganiu chunwijiui Scooty (*TVS- Jupiter*) paman Rk. 80,000/- kumjiu kasanbo pikhai bide. Pakykhun niu Rapiu gu Ministry leng chaben dihjiu nkha khaijiu bambo leng jeng niu Tingwang tu thuongkiu ye khatdi Kykhunmai tu thuongkiu bo madu khai lanne.

Rapiu Tingwang gu nchang-nthuiibo thoidam pikhaijiu lung chariumaitu nkha khai sibo khatdi Rapiu gu agi-manaibo thoidam dousanbo kykhunmai thiubamlo!

December 9, 2020

LNBA (M) gu worker (Driver) Stephen Newmai khatdi Alinliu Chawang panaitu LNBA (M) Centre Church ga Masanbo Magiang tienduan Rev. M. Kaidombou, Pastor, LNBA (M) Centre Church niu Tienthinpao thiujju kam khai de.

December 12-13, 2020

Jaduning (Kadi II) Baptist Church gu chabuan phum niu tingkum makai mangiu (25) tang kalubo Silver Jubilee hai Tingwang ken kam madi jiu cha'ngge khai lude. Rev. Alungbou Newmai, Executive Secretary niu Chamdinpao thiujju kawicham dinkhai ye,

Kadalungbou Newmai, Youth Secretary niu Laddinpao thiujju "The role of Christian Youth" lam ga din khai ye khatdi Rev. Ch. Ngouroubui, Men Secretary niu Tienthinpao thiujju tienduan hina wiju tadkiu khai de.



Watheng mak ga tadkiu rabo dung

19-20 Dec 2020	Liangchi Baptist Church Platinum Jubilee
03 Jan. 2021	General Fasting
05 Jan. 2021	HEHS Admission Open
08 Jan. 2021	Head Office Reopen
09 Jan. 2021	LNBA (M) CCT Annual Meeting
15 Jan. 2021	Cabinets Sitting
18 Jan. 2021	HEHS Class Resume (KG - 9)
18-19 Jan. 2021	Audit of Head Office Account
23-24 Jan. 2021	Sunday Bible School Teacher's Training at Taniulong Baptist Church.
26 Jan. 2021	LCPMMM Board Annual Sitting at LNBA (M) CCT
27-28 Jan. 2021	Annual Delegates Assembly at LNBA (M) CCT
30 Jan. 2021	Education Board & Staff s' Fasting

Pastor gu Salary Structure

LNBA (M) Phumling hina gu Pastor salary hai ADA 2019 ga chamsui lukhaibo kumjiu LNBA(M) Head Office lamsu Salary structure machapat khaibo system haise 2021 January gasu tad su mira Phumling kasia gara din masan khai mide. LNBA (M) workers mainiu mathiuna gu Phumling ga thaikum wangkhai tanglak bam tadi sibo jai ga tad khai raleng salary structure se pikhai kam mide. Siga phui lujiu simasan makbo bamsai office ga maniu khai khelo.

- A) Basic Salary haise total net ganiu 30 - 50 % ga bamra bo ye
- B) Dearness Allowance (DA) -Basic ganiu 30% pira ye.
- C) Medical Allowance hai flat rate ga 500 piraye
- D) Administrstion Allowance hai flat rate ga 1000 piraye
- E) Hospitality Allowance hai Flat rate ga 500 piraye
- F) Phone Allowance hai flat rate ga 300 piraye
- G) Office Allowance se basic gu 15% ga pira ye.
- H) Ordination Allowance hai 1000 pira ye
- I) Licentiate Allowance hai 500 pira ye
- J) Children hai flat 500 piraye

Trained Allowances:

- i) B. Th. - 200
- ii) B.D./M.Div. - 500
- iii) M.Th. - 700
- iv) Doctorate - 1000
- v) ICLD Certified - 100

Increment:

- a) Takum machang 100 khaisan khang ra ye.
- b) Seniority Allowance takum manguiu (5) tang mibo machang 500 khaisan khaira ye.

Gratuity hai pastor niu retire thiumibo wan ga paleng pikhai rabo ye. Pastor gu gratuity haise chahiu 13bo hiugu net salary riak se paben ga pikhai makjiu pagu gratuity fund ga makhuan madui khaira ye.

LNBA (M) Pastor's Salary Table

Haiga lien khaibo Income gu sai suijiu local church dung niudi pasuat-pasuat ga phui lujiu hainiu tam thubo thiujii pikhai lo.

Salary Components	RANGE OF INCOME			
	200000 - 400000	500000 - 1000000	1100000 - 1500000	1600000 - 2000000
	Band-A	Band-B	Band-C	Band-D
Basic (Upto 50% of Net)	3,000.00	5,000.00	7,000.00	9,000.00
DA (30% of Basic)	900.00	1,500.00	2,100.00	2,700.00
Medical Allowance (500)	500.00	500.00	500.00	500.00
Administration Allowance (1000)	1,000.00	1,000.00	1,000.00	1,000.00
Hospitality Allowance (500)	500.00	500.00	500.00	500.00
Phone Allowance (300)	300.00	300.00	300.00	300.00
Children Allowance (500)	500.00	500.00	500.00	500.00
Office Allowance (15% of Basic)	450.00	750.00	1,050.00	1,350.00
Trained Allowance (See Note)	-	-	-	-
Ordination Allowance (1000)	-	-	-	-
Licentiate Allowance (500)	-	-	-	-
Seniority Allowance (500/5 Yrs)	-	-	-	-
Yearly Increment (100/Yr)	-	-	-	-
Gratuity Saving (13th Month)	595.83	837.50	1,079.17	1,320.83
Gross Salary	7,745.83	10,887.50	14,029.17	17,170.83
Net Salary	7,150.00	10,050.00	12,950.00	15,850.00

Salary Components	RANGE OF INCOME			
	2100000 - 2500000	2600000 - 3000000	3100000 - 4000000	4100000 - 5000000
	Band-E	Band-F	Band-G	Band-H
Basic (Upto 50% of Net)	10,000.00	12,000.00	13,000.00	14,000.00
DA (30% of Basic)	3,000.00	3,600.00	3,900.00	4,200.00
Medical Allowance (500)	500.00	500.00	500.00	500.00
Administration Allowance (1000)	1,000.00	1,000.00	1,000.00	1,000.00
Hospitality Allowance (500)	500.00	500.00	500.00	500.00
Phone Allowance (300)	300.00	300.00	300.00	300.00
Children Allowance (500)	500.00	500.00	500.00	500.00
Office Allowance (15% of Basic)	1,500.00	1,800.00	1,950.00	2,100.00
Trained Allowance (See Note)	-	-	-	-
Ordination Allowance (1000)	-	-	-	-
Licentiate Allowance (500)	-	-	-	-
Seniority Allowance (500/5 Yrs)	-	-	-	-
Yearly Increment (100/Yr)	-	-	-	-
Gratuity Saving (13th Month)	1,441.67	1,683.33	1,804.17	1,925.00
Gross Salary	18,741.67	21,883.33	23,454.17	25,025.00
Net Salary	17,300.00	20,200.00	21,650.00	23,100.00

ACKNOWLEDGEMENT (Chunwicham)

Kadampao Tingwang, Ranpao Jesu Khrista, Jukhaipao Masanbo Hiupuina, atu lungwang khailu akhikhai-machakhaibo apui-apui thiumai, anamnah thiumai, atu Gospel tienleng kupad khaibo (1985) Rapiu, atu Pastor leng makuat khaibo khatdi thinpiu khaibo (1986- March 1995) Rianglong Baptist Church, atu Executive Secretary (E.S.) leng thinpiu khaibo (April 4, 1995 – May 4, 2020) LNBA-M khatdi nkiu-nkinjiu atu E.S. gasu retired pikhaibo nai npamjiu kanuikhaibo tienthiubo (1st Dec. 2020) ga jaokhaijiu thoidam pikhaibo ronna makjiu kalen pikhai mai mathiu khuga chunwicham pikhaibo ronna makjiu thuankiubo poupad khai-e.

1. LNBA-M Office lamsu: Rs.1,70,000/-
2. Local Churches lamsu: 1st: One church: Rs.32,000/-
2nd: One Church: Rs.31,000/
3rd: Three Churches: Rs.10,000/- (Each)
3. Churches Societies lamsu: 1st: One Society: Rs.5,000/-
2nd: One Society: Rs.3,000/-
3rd: Five Societies: Rs. 2,000/- (Each)
4. Individuals lamsu: 1st: One Person: Rs.10,000/-
2nd: One Person: Rs. 5,000/-
3rd: Five Persons: 2,000/- (Each)

Piwangbo pakhiangna din masan padbo ga Churches 58, Societies 58, Individuals 132, khatdi Village Authority khat gasu Rs. 4,00100/- haise daolu-e.

Chapot piwangbo:

Churches, Societies including ZBCC khatdi Individuals pakhiangna 16 gasu chapot 16 daolu-e.

Maluad pon ncham khaibibo:

Families 2, Churches 2, LNBA-M Department 1 gasu, khatdi LNBA-M Head Office gasu chiujiu chunwibo dam lujiu kykhonmai mathiu tu maluad pon ncham khaibi-e.

Naliu mathiu khuga chunwicham paopad khaibo ronna makjiu naliu tu thuankiune chiubo chamse din madukhai-e. Nailu leng thoidam khengkhaijiu bamme. “Masanbo Bible chamkeng gasu thoikhaibo thoidamse naliu khang khat-khat khuga wangtang khaibo thiumisulo,” Amen. “Kadaomai song pipadmai sanwi-e” Tienkam 20:35.

The 1st December, 2020.

Rev. Z. Mairilungbou Niumai,
*Retired Executive Secretary, LNBA-M.
LNBA-M Centre Church, Namraining (Tamei).*

Liangmai Christian Centenary Celebration

Annexure A [Planning committee meeting 15-09-2020 bonai gu chamsui no. 1]

Liangmai Christian Centenary Celebration - 2023 gu church share se LNBA-M ga bambo Church gu membership riak (popupation) tu phui lujiu group charuk (6) leng palang njan pat khai ye. Siga Church niu pirabo khatdi Society dung niu pirabo padam se group sai suijiu rietkhai bamme. Installment ganiu, maksai full payment thiujui pikhai di sui ye. Population share se maikhat ga Rk. 20 sedi Local Church niu kakha khaira sikhai ye.

Group A	Group B	Group C	Group D	Group E	Group F (Fellowship)
General - 100000	General - 60000	General - 40000	General - 30000	General - 20000	General - 10000
Youth - 6000	Youth - 5000	Youth - 4000	Youth - 3000	Youth - 2000	Youth - 1000
Women - 6000	Women - 5000	Women - 4000	Women - 3000	Women - 2000	Women - 1000
Men - 3000	Men - 2500	Men - 2000	Men - 1500	Men - 1000	Men - 500
Ariang B/Ch.	Aling B/Ch.	Bena Nguang B/Ch.	Chakha B/Ch.	Aling II B/Ch.	Kawiram F/Shingra
Bena Tababang B/Ch.	Bamreklong B/Ch.	Dikiuram Nhang B/Ch.	Chawangkinging B/Ch.	Asiluang B/Ch.	Liangmai F/Noney
Chiang B/Ch.	Konphung B/Ch.	Gaililong B/Ch.	Dutlong B/Ch.	Atongjuning B/Ch.	Marenmai F/Senapati
Liangchi B/Ch.	Machengluang B/Ch.	Kuilong I B/Ch.	Juna B/Ch.	Jengsan B/Ch.	Rangem F/Namtiram
LNBA-M, CCT	Shingra B/Ch.	LBC, Imphal	Kabonram B/Ch.	Kadi V B/Ch.	Shalom F/Tml
Malek B/Ch.	Taningjam B/Ch.	LNBA-M SCC, Namdilong	Kadi I B/Ch.	Kajinglong B/Ch.	
Oklong B/Ch.		Luangdi B/Ch.	Kadi II B/Ch.	Kalalong B/Ch.	
Rianglong B/Ch.		Maguilong B/Ch.	Kadi III B/Ch.	Khazam B/Ch.	
Thalon B/Ch.		Makuilongdi B/Ch.	Kadi IV B/Ch.	Kuilong III B/Ch.	
UBC (L), Tml		Namtiram B/Ch.	Kawalong B/Ch.	Nienlong B/Ch.	
		Nheng B/Ch.	Kuilong II B/Ch.	Nkhomlong B/Ch.	
		Niamning B/Ch.	Nallong B/Ch.	Rienta II B/Ch.	
		Nkou Nhang B/Ch.	Ndai B/Ch.	Tabam B/Ch.	
		Piulong B/Ch.	Nkou Nri B/Ch.	Thiujaining B/Ch.	
		Rienta I B/Ch.	Phelong B/Ch.		
		Taniulong I B/Ch.	Ramtinglong B/Ch.		
		Taphou Liangmai B/Ch.	Tapon Nguang B/Ch.		
		TBC, Tamei	Tapon Nsan B/Ch.		
			Tedlong B/Ch.		
			Thebram B/Ch.		
			Tudon I B/Ch.		
			Tudon II B/Ch.		
			Upper Dikiuram B/Ch.		
			Upper Phelong B/Ch.		
			ZBC, Senapati		

KAKHENG THIUKHAIRA

- A. Liangmai Christian Centenary Celebration 2023 masuang ga 100 missionaries langpadra.
- B. LNBA(M) Phumling hina ga Tingwang tu sibo katheng kadimai chapad bamra.
- C. UPSC Main Exam ga jou ramai Liangnah dung leng kakheng thiu khaira paliu gu details pahang ga pikhai ye;
 - 1. Dinsuibou Moita S/O Kairiliangbou Moita, Thalon Village
Tuhoi Shillong ga lung bam-e.
UPSC CSE, Roll no: 1601165
Exam Centre: Guwahati
 - 2. Lungphakbou K. Dichongta S/O Khangzinang K. Dichongta,
Rianglong (Lenglong) Village
Tuhoi pahai Delhi ga bam-e.
UPSC CSE, Roll no: 0806515
Exam Centre: Delhi
 - 3. Machamwangbou Newmai S/O Kaijinang Newmai, Tapon Village
UPSC CSE, Roll no: 1600903
Exam Centre: Guwahati

Paliu gu Exam dates: 8th, 9th, 10th, 16th, 17th January 2021.

- D. LNBA-M Ministry khatdi Phumling gu Ministry leng.

Phumlingmai mathin tu
Chunwibo Christmas thinlo
tinjin LNBA (M) lam nin
kanni khai ye
&
Takum Kasan 2021 wang
boga wahina wi nthwibo takum
thin!

Christmas ting hai agibo jeng niu cha kathiubo se mathiu niu sakjiu bambo kum, thainai haiga aliu mathiu niu sakwibo cha sak ncham khaira *Fika Coffee Bar, Tml.* niu Recipe machapat khai bamme.



Ngut rabo mania (**Ingredients**):

Makhuidui (*Honey*), Kabiui (*Ginger*), Champra (*Lemon*), Thiumin-gi (*Cinnamon*) & Chaniu (*Tea Leaf*). Mania khai kengbo khai tambo sera sak ramai chun ye.

Steps:

1. Tadui ga chaniu khatdi Thiumin-gi khaijiu lang taa khailo.
2. Chapiang ga Makhuidui khailo, Kabiui lim khai lo khatdi Champra padui thun khai lo.
3. Tadui lang taa mibo se chapiang ga liang khai jiu kariu mawi khailo.
4. Tadui thiui bam ga sak sui de.



Women Department gu Annual Meeting 2020 ga wang jou khai mai dung



Mission Department gu Annual Board Meeting tadkiu bambo



Online Bible Recitation Competition ga jou khaimai nahmai dung



LNBA (M) Centre Church



LNBA (M) Sub-Centre Church, Namdilong New Building visit thiujui kakheng thi u ncham khaibo



Diphubou Newmai niu Children Ministry leng Scooty kasanbo donate thiukhai ye.



LNBA (M) Youth Department gu kasanbo Gypsy E/S niu Dedication kamkhaibo.